

ጳውሎስ ተሰሎንቄ መረሃ ከተሶ ሶህኑተ ኣጉስ

ተሰሎንቅት መቄዶን ዬኖ ሮሞ ባዲሃ ሎረ ከተመ እቅ፤ ጳውሎስ ተሰሎንቄን መገን አመዕናኖ ዱእ ምኒ ኡርሾሁ ፍልጽሰዩሰ ባዱ አጉር ኦርዕዮች ኤተሮንት፤ እሁን ቤሉ አይሁድ ሃይማኖቲ ቶጎተ ሆንጠኮ መገኑ ደግቡ ኡመት ጳውሎስ ሆንጠህሰኖ አመዕናኖ ሶህኖን ተሸ ይቶኢሃ እኮቤቺሃ አይሁድ መኑ ጢቅሰ ጳውሎሴ አሌን ኬኑ እቅ፤ ህካን እኮቤቺሃ ጳውሎስ ተሰሎንቅት አጉር ቤርዮ ዬኖቤቹ መርተ ግደ እኮስ፤ ዱንክ ቆሮንቶስ ኢሊገን ሆንጠክ ሀዕለንስ ሄዕዮ ጠሞቲዎስ ተሰሎንቅት መር ፈንቀሎገን አመዕናኖ በላን ኬዕዮርቹ ሂር ኩሎስ።

ጳውሎስ ዎኔስ ሶህኑተ ተሰሎንቄ አመዕናኖተ ከተሶሁ አመዕናኑተ ጠረኝሲሃት እቅ፤ አመዕነትሰለክ አተሰ ጡመ ዱዱቡ ሞጮጭ መገኑ ገለትጨኦ፤ ጳውሎስን በለሰ ደገሞ ወክት ሀትኔ ሄኑ ሄዕዮጎር ቃግሰኖሳት፤ ህከኒች በርግ መሲህ ኢስ ፈንቀል አሜተኖ ዬኖ ጠው አሌን ኬኑ ጠዕምቶተ መሰለ ኣሰኖ፤ ህተን ጠዕምቶች መት-መቱስ፡-

«መሲህ ኢስ ፈንቀሎተ ብርተ ሬቶ አመዕናኑት መሲህ ኢሲ ፈንቀሊንከስ ደግሲሰኖ ዘላለም ሄእ ቤቀንታእረ እካእንዶ? መሲህ ኢስ ፈንቀል አሜተኖሁ መ ወክትዬት?» ይታእታን፤ ጳውሎስን ህከን ሃሌን «መሲህ ኢስ ፈንቀል አሜትሰ ትምርት ተብሌን አገርቴንን ጨለ ይቱን ሆጉክዕኔ እዕዬ» ዮን ሸዢስ።

መጻፍሰ አፎሃ

ኣጉስ (1፡1)

ጳውሎሴ ሙንዲተለክ ገለትጨስ (1፡2—3፡13)

አመዕነቲን ሀት ሄኤኖ ጎር ኩለመኖ ትምርት (4፡1-12)

መሲህ ኢስ ፈንቀል አሜቱስ ኩለኖ ትምርት (4፡13—5፡11)

ጎፍሜ ሸዘነተ (5፡12-22)

መጨረሻስ (5፡23-28)

¹ እነ መገንለክ ቀርቾሃ መሲህ ኢስረ እኮሀኑኡተ ተሰሎንቄን ዮ መገን አመዕናኖ ዱእ ምኒ መረሃ ጳውሎሴች፡ ሲላሴቸለክ

ጠሞትዎሴች ሶሀንቶአተ ሶሀኑ፤ አስቱትለከ ወገሬቱ ክዕኔሃ እሁን።

ተሰሎንቄ አመዕናኖ ሄኡለከ አመዕነቱስ

² ነኡ ዱኣ አዕናም ወክት ጉዕመንከ ክዕኔተ ቃንገን ክዕኔተኔሃ መገኑ ገለትጭናም።

³ አናኔ መገን ብሬን አመዕነቲን አቴንተ ሆጉተ ኢታን ጠረኝቲን አኡክዕኔለከ ቀርቼሃኔ መሲህ ኢሳን ሮህዕኔ ተብሴክዕኔ ጠረኝመተ ጉዕመ ወክት ቃንጋም።

⁴ መገኒን ኢተንቲንተ አመኦሶ! መገኑ ደዕሬህዕኔገ ደንጋም።

⁵ ነኡ እንጂሊ ክዕኔቤቹ ኤንሶሚሁ ጠለዕል ላጋን እሁዕነ ወልቃንለከ ጠሊሊ አያን እንጂሊ ሀንቅ አመዕነንት፤ ህትን ክዕኔን ሜጡብ ሄዕናም ወክት ክዕኔተ ሀዕልኖተ ሀት እንክ ሄዕናም ጎር አዕኑ ገውንኩክዕኔ ደጌነንተ።

⁶ ልገብ ኦርሸት እልቶህዕኔ ጎሬሁ ጠሊሊ አያኒን ደገንቶ ሙንዲኖን ላገሰ ቶጌንታኣ፤ ኔሳለከ ቀርቼ አጉዴንታኣ።

⁷ ህካን እኮቤቹሃ አዕኑ መቄዶናንለከ አካይ ባዶን ሮ አመዕናኖተ ጉዕሚንከ ጡመ ሞሳልተ እኬንተሰ።

⁸ ቀርች ላገት ክዕኔች ፋልት ሞጮጨንቶኢሁ መቄዶንለከ አካይ ባዶን ጠለዕል እሁዕነ መገኖን ሮህዕኔ አመዕነቱ ጉዕመ ቤቸን ሞጮጨሞቤቹሃ ከን ጠዊሃ ነኡ መቱርቹሃ ጠወኡ ሀሰሰኤበአ።

⁹ ክዕኔቤቹ አሜንቶም ወክት ጡመገ ቶጌነንተገለከ አዕኑ ሸርክክዕኔ ጌኝአቴን ሀንቅለከ ሄአኖ መገኑ ካደሚሃ ሀት እኬን ፈንቀልቲንተ ጎር እሰ ገውንኩሰ ኩልታኣ።

¹⁰ ህትን መገኑ ሬሆች ኬሾሲሃ፥ አሜታ መገን ኡሙዕሬቶ ጡምሰኤሃ፥ ቤቱሰ ኢሰ ሰሜቶ አሜተኖገ ሀት እኬን አገርቲንተ ጎሬ ኩልታኣ።

2

ጳውሎስ ተሰሎንቄን አዕኖ ሆጉተ

¹ አመኤ ኦሶ! ነኡ ክዕኔቤቹ አሜቱኔ ተሰ እሁ ሆጉሰ አዕኑ ገወክዕኔ ደጌነንተ።

² አዕኑ ደጌነንተገን ከኒች ብርተ ፍልጽሱሰ ከተማን ሮም ወክት ኦርሸትለከ ቦርዕረንሹ ኢሌኔገ አዕኑ ገውንኩክዕኔ ደጌነንተ፤ ጠዉ እኮጎሬ እበ ሀንበዕለንሺን መገን እንጂሊ ላገተ ክዕኔሃ ጠወዕኖተ መገኑኔ ጠረኝመተ አሰኖኤ።

3 ነኤ ክዕኔተ ሸንዘንክዕኔሁ ሉጩንሺን ህከረንገ ሂላ ያዳን ህከረንገ ጣንሰኖህዕኔተ ሀንሰበኦ።

4 ጠዉ እኮጎሬ መገኑ እንጂላ ኤገተ ኔሳሃ አመዕን ኣሴኔቤቺሃ ቀልብኔ አጥራመኛ ደገኖ መገኑ ሙንዲሲሲሰ ቤሉ መን ሙንዲሲሲሰተ ጠወዕናምበኦ።

5 መቼ ወክትሃ ክዘቢን ናንደን ህከረንገ ብር ጎራምመት ሄኣኔ ሆሮ አሜቱ ሆጉኔ አዕኑ ገዉንኩክዕኔ ደጌነንተ፤ መገኑ ምስክርሃኔ።

6 ነኤ ክዕኔኛ እኮ ህከረንገ ዋሎ መኒኛ አዬችሁ ኬዕምኛ ሀንሶምበኦ።

7 ነኤ መሲህ አሳበተ እንኮምገን ሀሰሰኖኔሃ ክዕኔኛ ጠዕምኖተ አታልናም እቅ፤ ጠዉ እኮጎሬ አመት እለሴ አገርታሀንገን ክዕኔ በላን ጎደበ ላፍማን ሄዕኖም።

8 ህትን አበ ኢትናንክዕኔቤቺሃ መገን እንጂላ ክዕኔኤሃ ኩሉ ጠለለ እሁዕነ ነብሳኔ ህግንሰ ኣሰኖተ ተቃጠንቦም እቅ፤ አዕኑ ኔሳሃ ጤዕንሻመተኔ።

9 አመኤ ኦሶ! ሆጉኔለክ ሆንግኔ ደጌነንተ፤ ክዕኔሃ መገን እንጂላ ጠወዕናንክዕኔ ወክት ክዕኔተ ኦርንሶህዕኔበኦተ ሀንከዕርተለክ በራሃ አዕኖም።

10 ክዕኔ አመዕናኖ በላን ሄዕኖም ወክት ነኤ ህትኔ ጠሊልማን፤ ፈያትተለክ ቀነጤኖርቹ ዮበእረ እንክ ሄኢሃኔ አዕኑለክ መገኑ ምስክርሃን።

11 እኑ አላተሰ አእኖሀንገን ነኤሁ ክዕኔሃ መት-መቲሃክዕኔ እኤኔ ደጌነንተ።

12 ጉዕመ ወክት ሸንዘንለክ ጠረኝንሰን ጄነትሰለክ ኬዕምኝሰ ቤቀንቶኖተ ገኤህዕኔ መገኑ ተሸ የኖ ሃሊን ሄኦኖተ ኤገተ ይኖንክዕኔገ ደጌነንተ።

13 ኒኛ መገን ላገተ ሞጮጭቲንተ ወክት መን ላገገ እሁዕነ መገን ላገገ አቲን ቶጌነተቤቺሃ መገኑ ጉዕመ ወክት ገለትጭናም፤ ሁኩ ላገነት ሀንቅንከ መገንተ ላገ እቅ፤ እሴን አመዕንቲንተ ክዕኔ ኣዜን ቲሁ አታኢት።

14 አመኤ ኦሶ! አዕኑሁ መሲህ ኢሰ አዲን መገኑ አመዕኔ መን ጭምት ይሁድ ባዶን ዮእረ አጉዳነንተረ እኬንታኦ፤ መሰንትሰ እሰ አይሁድ መኒኛ ኦርሸተ ቶጎገን አዕኑሁ ገይክዕኔ አድ መኒኛ ኦርሸተ ቶጌንታኦ።

15 አይሁድ መኑ ቀርቹ ኢሰለክ ነብያከተ ሽቶአራን፤ ኔሳሁ ሸርቶአራን፤ ህትን እሰ መገኑ ሻዝሳአረለክ መን ጉዕመንከ ግቦእረ።

16 ህትን አይሁደ እህቡ መኑ ጡምቶተ መገን ላገተ ኩልናምበእገ ከንታኔ፤ ከኒን ጨቢ ጨብ አሌን በርግተን መርታአረ እኮቤቺሃ ኤተር ገዳን መገን ኡሙዕርት እሰ አሌን አሜቶኡ።

ጳውሎስ ተሰሎንቄ መነ ለንኪሃ ለአተ ሄዕዮስ ሄዕላቸተ

17 አመኤ ኦሶ! ሰውቲን እሁዕነ ማሊን አደ እንክ አልተ አሌን ለአቀሙዕነ ቀዉ ጌስ አገርኖምቤቺሃ ለዕኖህኔተ አበ ሄዕላንቶም።

18 ክዕኔቤቹ አሜንቶተ አበ ሀንሳም እቅ፤ አበንከ አን ጳውሎስ ክዕኔቤቹ አሜቶተ ልግብ ወክት ሀሾም እቅ፤ ጠዉ እኮጎሬ ሺይጣኑ ከሞኔ።

19 ቴሱ ተብሶኔለክ ሙንዲኑኔ ህከረንገ ቀርቼኔ ኢስ አሜቶ ወክት ብሬስ ቦናም ድሉኔ እዬት? አዕኖትበእንደ?

20 ኤ ሀንቅያን፤ ኬዕምቹኔለክ ሙንዲኑኔ አዕኖት።

3

1 ከኒች ኤተሮን አታዕሉ ሆንጎምቤቺሃ ነኡ ጠለዕል አቴን ከተማን ፈቁ ጡመ አጉጅ ለሌኔ።

2 ኒንን ሜጡብ መሰህ ኢስ ተሸት ላገተ ኩለኖ መገን ካዲንቹ አመኔቤቹ ጥማቶስ ክዕኔተ ጠረኝሶህዕኔተለክ አመዕነቶንከክዕኔ ጠረኝቶኖተ ሸዘህዕኔተ ሶንኮም።

3 ሁኩንን ኢልቶህዕኔ ኦርሻን ጠረኝቲን ኡርቲንተገ አሰኖህዕኔ፤ መሰንትሰ ት ኦሪሸት ኔሳሃ መገኒች እኮሃ እሁስ አዕኔ ገዉንኩክዕኔ ደጌነንተ።

4 ክዕኔን ሜጡብ ሄዕኖም ወክት ኦሪሸት ኢልታኔገ ሄጭን ኩልናንክዕኔገን ቴሁ ሁኩ ኦሪሸት ኢልቶኔ፤ ህካንን አዕኔ ደጌነንታኡ።

5 ህካን እኮቤቺሃ አታዕሉ ሆንጎምቤቺሃ አይደገ ሻይጣንቹ ፊተነንክዕኔ ቆንዶዱኔ ተሰ በዕዮንዶ ይ ዋጅ አመዕነቱክዕኔ ደጎተ ጥማቶሴ ክዕኔቤቹ ሶኮም።

6 ጠዉ እኮጎሬ ቴሱ ጥማቶስ ክዕኔቤቹ ፈንቀል አመዕነትክዕኔተኔሃለክ አተክዕኔተኔሃ ነኡ ክዕኔተ ለዕኖተ ሄዕላንቶምገን አዕኔሁ ኔሳሃ ለኦኖተ ሄዕላቲንተገለክ ጡመ ጠዉ ሰውይቲንተገ ክዕኔተኔሃ ተሸ የኖ ዱዱቡ ኩሎኔ።

7 አመኤ ኦሶ! አበ ኦርሸለክ ሸረም ኣዜን ሄዕኖምጎሬሁ አመዕነትክዕኔ መሳን ክዕኔን ጠረኝኖም።

8 መሰንትሶ አዕኑ ቀርቾ ኢሳን ጠረኝቴን ኡሩክዕኔ ኔሳሃ ጡመ ሄኢን ሄዕናምገ አኣኖኔ።

9 ክዕኔ መሳን መገን ብሬን ሙንደዕናም ሙንዲኖሃ መገኑ ሄንከ ገለትጭናም።

10 ክዕኔተ ለዕኖህዕኔተለከ አመዕነቶንከክዕኔ ሆፈዕኖሃ ዊንሸኖተ ሀንከዕርተለከ በራሃ ጠረኝነሰ ዱእ አዕናም።

11 እነኔ እኮ መገኑኔለከ ቀርቼኔ ኢሰ ክዕኔቤቹ አሜንቶተ ዎቃኔ ብዝ አኡን።

12 ነኡ ክዕኔተ ኢትናምገን ገገውክዕኔ ዮህዕኔ ኢትተለከ ዎሎ መኒሃ ዮህዕኔ ኢታን ቀርቼ በትሶህዕኔ ነሶህዕኔ።

13 ቀርቼኔ ኢሰ ጠሊላኖን ጉዕሚን ሜጡብ አሜተኖ ወክት መገኑኔለከ እንኔ ብሬን ኩሌኖርቹ ዮበኢሃለከ ጠሊላኑተ እኬን ደገንቶኖተ ቀልብክዕኔ ጠረኝሱን።

4

መገኑ ሙንዲሲሲኖ ሄኡ

1 መጨረሻን አመኤ ኦሶ! መገኑ ሙንዲሲሲሃ ሀት እኬን ሄኡ ሀሰሰኖህዕኔጎሬ ኒቶ ተማርቴንታኣ፤ ቲሁ ሀትን ሄኢነንታት፤ ቀርቾ ኢሰ ሱዕሚን ኡጭናንክዕኔሁለከ ሸንዛንክዕኔሁ ከኒቶ ብርተ አቴንተሀኒቶ በትሴን አቶኖታት።

2 ቀርቾ ኢሰ ሱዕሚን ሀትኔ ትዛዝ አሰኖንክዕኔገ ደገኒንተ።

3 መገኑ ሀሰኖሁ አዕኑ ጠሊላኑተ እኮኖታትለከ ዝናቶ ቄዕርቶኖታት።

4 ክዕኔቶ ጉዕሙንኩጎኑ ሞንሰ አማን ጠሊልማንለከ ኬዕምኝን ሄኡ ደጉን።

5 መገኑ ደግቦ ኡመትገ ማል ሄዕላቸት ጠቅቴንከህዕኔ።

6 ከን ጠዋን አዪሁ አመሰ ቤት አሌን ሂለ ጠወ አኡንከ ህከረንገ ጣንሱንከ፤ ከኒቶ ብርተ ጠረኝነሰ ኩልኖንክዕኔገለከ ሸንዛንክዕኔገን ሀት አታ መነ ቀርቼ ቀጠአኖሰ።

7 መሰንትሶ መገኑ ገኤኔሁ ጠሊልማን ሄዕኖታት ቤሉ ንጆሰ እኮ ጠወ አዕነን ሄዕኖታበኣ።

8 ህካን እኮቤቺሃ ከ ሸዘነተ ግበኖሁ አዪሁ መነ አሁዕነ ጠሊሊ አያነ አሴኔ መገኑ ግበኖሃን።

9 ገገዉክዕኔ ኢተቀንቶኖተ አዕኑ ገዉክዕኔ መገኒቶ ተማርቴንታቤቺሃ አመዕና ኢተተኔሃ አዪሁ ክዕኔኤሃ ከተሶህዕኔተ ሀሰሰኖበኣ።

10 መቄዶን ባዶን ሄኣ አመዕናኑተ ሀንቅንከ ኢትቴነንታት፤ እኮጎሬ አመኤ ኦሶ! ቴሱ ሸዛንክዕኔሁ ዎዕኔች በትሴን ኢትቶኖታት።

11 ከኒች ብርተ ኩልኖንክዕኔሁ አደቢን ሄኦኖታቲ፥ ገይክዕኔ ጠወ አገርቶኖታትለከ አንጋንተክዕኔ አቴን ገልቶኖታት።

12 ህት አቴንተጎሬ አመዕንቡ መኑ ኬዕምሰኖህዕኔረለከ ቡዕለክዕኔ አታልቴን ገልቴንተረ እኬነንተ።

ቀርቼ ፈንቀል አሜተኖሃ እሁስ

13 አመኤ ኦሶ! ተብሶሁ ዮበእ መንገ ሻዜነንተበእገ ሀሳም፤ መሰንትሰ ሬዮ መንተኔሃ ሀንቅሰ ደጎኖተ ሀንሳም።

14 ኢሰ ሬዮገለከ ሬሆች ኬዕዮገ አመዕንኖም፤ ህካን እኮቤቺሃ ኢሰን አመዕንት ሬቶ መነ መገኑ ኢሰን ሜጡብ ኤበኖሰገ አመዕንኖም።

15 ቀርቼች ቶንጎም ላጋን ኩልኖንክዕኔ ቀርቼ አሜቶተ ኢለ ፎሊን ሄዕናም ነኡ ሬቶ መነ ሄጭናምበእ።

16 ቀርቼ ገወንኩስ ትዛዝ ሎረ ላጋን፥ መላይከ ሀለቅ ላጋንለከ መገን ጡሩምብ ላጋን ሰሜች አሜተኖ፤ መሲህ አመዕንት ሬቶአሩ ሄጭት ሬሆች ኬኣእ።

17 ህከኒች ኤተሮን ነኡ ፎሊን ሄዕናምሩ እሳንን ሜጡብ ጎመ አሌን ጭምይን ቀርቻ ኢሰን ቦብር አሌን ደቀሞተ ኬዕናም፤ ህትን ጉዕመንከ ወክት ቀርቼን ሜጡብ ሄዕናም።

18 ህካን እኮቤቺሃ ገገዉክዕኔ ህከን ላጋን ጠረኝጨቀሜ።

5

ቀርቼ ፈንቀል አሜተኖቤቺሃ ጠረኝቴን አገሬ

1 አመኤ ኦሶ! ኩ ጠዉ እሀኖ ዘማንለከ ወክትተኔሃ መቲርቼሁ ከተበሞተ ሀሰሰኖበእ።

2 መሰንትሰ ቀርቻ በሩ አሜተኖሁ ሞጋንቹ ሀንከዕርተ ድንገቴን አሜተኖሀንገ አሜተኖሃ እሁስ አዕኑ ገወንኩክዕኔ አጥራመቴን ደጌነንተ።

3 መኑ «ጉዕሙርቹንኩ ወገሬትየለከ አደጉ ዮበእ» ይተንን ኒጠናት ላፈ ሜንቱ አፋሀንገን ህከ ወክት በኡ ድንገቴን አሜች አፈኖሰ፤ ፋሽኢንከ አታልታበእ።

4 እኮጎሬ አመኤ ኦሶ! በሩሰ ሞጋንቹገ እክ ድንገቴን ኢለኖህዕኔበእገ አዕኑ ቴንሰቾንበእ።

5 ጉዕሙንኩክዕኔ ኑርለከ በሬተ ኦሱ፤ ነኡ ሀንከዕሬ ህከረንገ ቱንሰቶያረበኣ።

6 ህካን እኮቤቺሃ ነኡ በቅይን ገጫ አገዕሪን ሄዕኖ ቤሉ ዋሎ መንገ ግንሰንከ።

7 ግሳእሩ ሀንከዕሬን ግሳእ፤ ሰከርታእሩ ሀንከዕርተ ሰከርታእ።

8 ነኡ እኮገሬ ኑር ኦሱተ እንኮምቤቺሃ አመዕነቱለከ አተተ ወዘናን ኦደኤኖ ብረት ኦድኖገ ኦደዕን ጡም ተብሳ ቡዕላን ዋዕሬኖ ቆሜገ ዋዕርን ገኡ አገዕሪን ሄዕኖ።

9 መገኑ ገኤኔሁ ኡሙዕሬ እሁዕናን ቀርቼሃኔ መሲህ ኢሰ አዲን ጡሙ ደእኖታት።

10 ፎሊን ሄዕኖም ጎሬ ሬኖምጎሬ እሲን ሜጡበ ሄዕኖተ መሲህ ኒተኔሃ ሬዮ።

11 ህካን እኮቤቺሃ ወዕና አቲነንተገን መት-መቱክዕኔ ጠረኝጨቀንቲነን ገገጧክዕኔ ሀዕላቀሜ።

ጎፍሜ ሸዘነተለከ ወገሬት

12 አመኦሶ! ክዕኔ በላን ቀርቼን እክ ሆጎን ቆንዶድታረ ሀለቀክዕኔለከ ሸዛህዕኔረ ከበጅቶኖተ ኡጭናንክዕኔ።

13 ሆጎሰተኔ ከበጅዬሰ፥ ኢትዬሰ፤ ህትን ገገዊንከክዕኔ ወገሬቲን ሄዕዬ።

14 አመኤ ኦሶ፥ «ሆጉተ ኢትትበረ ሻቄ፤ ዘፋራኑተ መለልታገ አዕዬ፤ ላፋኑተ ሀዕልዬ፤ መነ ጉዕመንከ አታዕልዬ» ይን ሸንዛንክዕኔ።

15 አዪሁ ሂለ አዕዮሀኒሃ ሂለ አዕይ ፈንቀሸበገ አገዕሩን፤ ህከን ወጥ ጉዕመ ወክትንከ መት-መቲሃክዕኔ ጡመ ጠወ አቶኖተ ጠረኝዬ፤ ህትን ጉዕማንከ መኒሃ ጡመ አዕዬ።

16 ጉዕመ ወክትንከ ሙንደዕዬ።

17 ኡርሶኑዕናን ዱኦ አዕዬ።

18 ጉዕመ ጠዋንን መገኑ ገለትጭዬ፤ መሰንትሰ መሲህ ኢሰ አዲን ዮሀዕኔ ሄኢን መገኑ ክዕኔቶ ሀሰኖሁ ካኒት።

19 ጠሊለ አያን ገረተ ጠእሶኖቼ።

20 ራገ ህንቆኖቼ።

21 ጠው እኮገሬ ጉዕመ ጠወ ፊተንቲን ደጌን ጡመ ጠወሰ አፌ።

22 ሂለ ጠዊቶ ጉዕሚቶን ሁኜ።

23 ወገሬት መገኑ ጉዕመ ጠዋንን ጠሊለ አኡክዕኔ፤ አያኑክዕኔ፥ ፎሉክዕኔለከ ጅሰሙክዕኔ ቀርቼኔ መሲህ ኢሰ ፈንቀል አሜተኖ በሬተ ቀነጤኖርቼ ዮበኢሃ አገረም ሄኡን።

24 ገሌኔሁ አመዕነሞሃ እኮቤቺሃ ካን አአኖ።

25 አመኤ ኦሶ! ኔሳሃ ዱአ አዕዬ።

26 አመዕናኑት ጉዕመንከ አመዕናኖት አጉደኖ ተሽ የኖ ሃሊን ዝያዕረሜ።

27 ከ ሶህኑት አመዕናኖት ጉዕሚንከ አነበበንቶት ቀርቻ ሱዕሚን ኤገተ ያንክዕ።

28 ቀርቼሃኔ መሲህ ኢሰ ኣሰቱት ክዕኔን ሜጡበ እኩን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d